

# «La populaziun è ferm pertutgada»

La deputada Aita Zanetti (pbd Suot Tasna) spetga ulteriuras respostas

CUN AITA ZANETTI  
HA ANDREAS CADONAU / ANR DISCURRIU

■ **Aita Zanetti è s'exprimida il glindesdi passà en la debatta dal cussegl grond pertutgant il rapport parzial da la cumissiun parlamentara d'inquisiziun (PUK) e supplitgà da betg mussar il det sin la populaziun da l'Engiadina Bassa.** Ella spera da retschaiver ulteriuras respostas dal rapport final da la PUK e spera vinavant sin ina discussiun objectiva.

**ANR: Vos avais menziunà en la debatta dal cussegl grond davart il rapport da la PUK dad esser pertutgada persunalmain dal rapport. Co quai?**

Aita Zanetti: Quest cas na lascha fraid nagin en l'Engiadina Bassa ed jau hai menziunà en mes votum che nus essan ina regiun pitschna sco bleras autras regiuns grischunas e ch'ins s'inscuntra adina puspè persunalmain. Bain ni main bain enconuschan ins diversas personas menziunadas en il rapport. L'entira Engiadina Bassa è en il focus da las inquisiziuns da la cumissiun parlamentara.

**Co resenta la populaziun las discussiuns actualas, co è il clima ?**

Jau na poss betg discurre per l'entira populaziun, sulet forsà co ella resenta. I dat sa chapescha discussiuns entaifer la populaziun e forsà era famas. Ed i dat personas ch'èn en ina u l'autra moda pertutgadas directamain e che na vulan betg s'exprimer. Insumma, l'entira tematica occupa fermamain la populaziun da l'Engiadina Bassa.

**Vus avais medemamain ditg che la populaziun haja era suenter il rapport dapli dumondas che respostas?**

Betg dapli dumondas, dentant hai jau ditg che differentas dumondas sajan anc

avertas. Per exempel en connex cun la persuna principala. Daco esi vegnì uschè lunsch? La PUK ha fatg buna lavur, ha intercurrì la vart administrativa. Ella nun ha dentant resguardà la persuna sco tala, in proceder segiramain gist.

Sulet la dumonda resta: Pertge ha quella persuna agì uschia? Quellas dumondas èn anc avertas.

**Esì insumma pussaivel da retschaiver respostas concretas ?**



La deputada Aita Zanetti (pbd Suot Tasna) ha menziunà la situaziun da la populaziun da l'Engiadina Bassa en connex cun la PUK e si-as examinaziuns.

Jau na vi betg ma laschar ora sin speculaziuns, pertge speculaziuns datti en abundanza. Quellas discussiun na servan nagut. Nus stuain constatar ussa che betg tut ha funcziunà correct e ch'i sto dar remadura. Ma nus stuain era chattar ina moda simpla da cuntinuar.

**Han personas uffizialas, en enconuschientscha da las inquisiziuns, uss eventualmain resalvas dad intervegnir en in cas concret?**

Quai na dastga betg capitar. Per exempel, sch'ina dunna che ha tema da violenza e sa drizza a la polizia, sto ella retschaiver sustegn. Tut tschai fiss ina catastrofa. Segir sto il chantun instradar mesiras sin fundament da las inquisiziuns, i na dastga dentant betg dar ina bloccada. Gist perquai ston las personas incumbensadas da decider, vegnir scolas.

**Tge vul la populaziun da l'Engiadina Bassa savair da la deputada Aita Zanetti en connex cun l'inquisiziun?**

La gliעד ha forsà pensà ch'il rapport da la PUK sclereschia tut. Quai nun è il cas, era perquai che la lavur da la cumissiun cuntinuescha ed i vegn a dar in segund rapport. La lavur preschentada è sulet parziala e lura èn anc diversas proceduras penals avertas.

**Uschia che la tematica resta actuala ?**

Igl è da sperar che la discussiun restia vinavant objectiva.